

歷代帝王宅京記卷二十

崑山顧炎武著

吳縣朱記榮校刊

遼陽

遼

遼史地理志曰東京遼陽府本朝鮮之地周武王釋箕子囚去之朝鮮因以封之傳四十餘世燕屬真番朝鮮始置吏築障秦屬遼東外徼漢初燕人滿王故空地武帝元封三年定朝鮮爲眞番臨屯樂浪元菟四郡後漢出入青幽二州遼東元菟二郡沿革不常漢末爲公孫度所據傳子康孫淵自稱燕王建元紹漢魏滅之晉陷高麗後歸慕容垂子寶以句麗王安爲平州牧居之元

歷代帝王宅京記卷二十

一

宋氏槐廬校刊

魏太武遣使至其所居平壤城唐高宗平高麗於此置安東都護府後爲渤海大氏所有大氏始保挹婁之東牟山武后萬歲通天中爲契丹盡忠所逼有乞乞仲象者度遼水自固武后封爲震國公傳子祚榮建都邑自稱震王併吞海北地方五千里兵數十萬中宗賜所都曰忽汗州封渤海郡王十有二世至彝震僭號改元擬建宮闕有五京十五府六十二州爲遼東盛國忽汗州卽故平壤城也號中京顯德府太祖建國攻渤海拔忽汗城俘其王大譴讓以爲東丹王國立太子圖欲爲人皇王以主之神冊四年葺遼陽故城以渤海漢戶建東平郡爲防禦州天顯三年遷東丹國民居之升爲南京

城名天福高三丈有樓櫓幅員三十里八門東曰迎陽  
東南曰韶陽南曰龍原西南曰顯德西曰大順西北曰  
大遼北曰懷遠東北曰安遠宮城在東北隅高三丈具  
敵樓南爲三門壯以樓觀四隅有角樓相去各二里宮  
壤北有讓國皇帝御容殿大內建二殿不置宮嬪惟以  
內省使副判官守之大東丹國新建南京碑銘在宮門  
之南外城謂之漢城分南北市中爲看樓晨集南市夕  
集北市街西有金德寺大悲寺駙馬寺鐵幡竿在焉趙  
頭陀寺留守衙戶部司軍巡院歸化營軍千餘人河朔  
亡命皆集於此東至北烏魯虎克四百里南至海邊鐵  
山八百六十里西至望平縣海口三百六十里北至挹

歷代帝王宅京記卷二十

二

朱氏槐廬校刊

婁縣范河二百七十里東西南三面抱海遼河出東北  
山口爲范河西南流爲大口入於海東梁河自東山西  
流與渾河合爲小口會遼河入於海又名太子河亦曰  
大梁水渾河在東梁范河之間沙河出東南山西北海  
徑葢州入於海有蒲河清河浪水亦曰泥河又曰蘄芋  
樂水多蘄芋之草駐蹕山唐太宗征高麗駐蹕其巔數  
日勒石紀功焉俗稱手山山巔平石之上有掌指之狀  
泉出其中取之不竭又有明王山白石山亦曰橫山英  
顯十三年改南京爲東京府曰遼陽

金史地理志曰皇統四年二月立東京新宮寢殿曰保  
甯宴殿曰嘉惠前後正門曰天華曰乾眞七月建宗廟

有孝甯宮七年建御殿

置留守司

### 大定

遼史地理志曰中京大定府虞爲營州夏屬冀州周在幽州之分秦郡天下是爲遼西漢爲新安平縣漢末步奚居之幅員千里多大山深谷險阻足以自固魏武北征縱兵大戰降者二十餘萬去之松漠其後拓跋氏乘遼建牙於此當饒樂河水之南溫渝河水之北唐太宗伐高麗駐蹕於此部帥蘇支從征有功奚長可度率衆內附爲置饒樂都督府咸通以後契丹始大奚族不敢復抗太祖建國舉族臣屬聖宗嘗過七金山上河之濱南望雲氣有郭郭樓闕之狀因議建都擇良工於燕薊

### 歷代帝王宅京記卷二十

三

朱氏槐廬校刊

宮掖樓閣府庫市肆廊廡擬神都之制統和二十四年五帳院進故奚王牙帳地二十五年城之實以漢戶號曰中京府曰大定皇城中有祖廟景宗承天皇后御容殿城池湫濕多鑿井泄之人以爲便大同驛以待宋使朝天館待新羅使來賓館待夏使有七金山馬孟山雙山松山土河

聖宗紀曰統和二十七年夏四月丙戌朔駐蹕中京營建宮室

宋王曾上契丹事曰出燕京北門至望京館五十里至順州七十里至檀州漸入山五十里至金溝館將至館川原平曠謂之金溝淀自此入山詰曲登涉無復里埃

但以馬行記日約其里數九十里至古北口兩旁峻嶮  
僅容車軌又度德勝嶺盤道數層俗名思鄉嶺八十里  
至新館過雕窠嶺偏槍嶺四十里至如來館過烏灤河  
東有灤州又過黑斗嶺度雲嶺芹菜嶺七十里至柳河  
館又過松亭嶺甚險峻七十里至打造部落東南行五  
十里至牛山館八十里至鹿兒峽館過蝦蟆嶺九十里  
至鐵漿館過石子嶺自此漸出七十里至富谷館山八  
十里至通天館二十里至中京大定府城垣卑小方圓  
纔四里許門但重屋無築閣之制南門曰朱夏門內通  
步廊多坊門又有市樓四曰天方大衢通闔望闕次至  
大同館其門正北曰陽德閭闔城西內西南隅岡上有

歷代帝王宅京記卷二十

四

宋氏槐廬校刊

寺城南有園囿宴射之所自古北口居人草菴板屋耕  
種但無桑柘所種皆從壠上虞吹沙所擁山中長松鬱  
然深谷中時見畜牧牛馬橐駝多青鹽黃豕

金史地理志曰大定府遼統和二十五年建爲中京國  
初因稱之海陵貞元元年更爲北京置留守司都轉運  
司警巡院

會甯

金史地理志曰上京路卽海古之地金之舊土也國言  
金曰按出虎以按出虎水源於此故名金源建國之號  
蓋取諸此國初稱爲內地天眷元年號上京海陵貞元  
元年遷都於燕削上京之號止稱會甯府稱爲國中者

以違制論大定十三年七月復爲上京其山有長白青  
嶺馬紀嶺完都魯水有按出虎水混同江來流河宋瓦  
江鴨子河其宮室有乾元殿天會三年建天眷元年更  
名皇極殿 慶元宮天會十三年建殿曰辰居門曰景  
暉天眷元年安太祖以下御容原廟 朝殿天眷元年  
建殿曰敷德門曰延光寢殿曰宵衣書殿曰稽古又有  
明德宮明德殿熙宗嘗享太宗御容於此太后所居也  
涼殿皇統二年構門曰延福樓曰五雲殿曰重明東  
廡南殿曰東華次曰廣仁西廡南殿曰西清次曰明義  
重明後東殿曰龍壽西殿曰奎文時令殿及其門曰奉  
元有泰和殿有武德殿有薰風殿 其行宮有天開殿

歷代帝王宅京記卷二十

五

朱氏槐廬校刊

交刺壽水之地也有混同江行宮 太廟社稷皇統三  
年建正隆二年毀 原廟天眷元年以壽亭名天元殿  
安太祖太宗徽宗及諸后御容壽亭者太祖所嘗御之  
所也天眷二年作原廟皇統七年改原廟乾元殿曰世  
德正隆元年毀大定五年復建太祖廟 興聖宮德宗  
所居也天德元年名之興德宮後更名永祚宮睿宗所  
居也光興宮世宗所居也正隆二年命吏部郎中蕭彥  
良盡毀宮殿宗廟諸大族邸第及儲慶寺夷其址耕墾  
之大定二十一年復修宮殿建城隍廟二十三年以甃  
束其城有皇武殿擊毬校射之所也有雲錦亭有臨漪  
亭爲籠鷹之所在按出虎水側

大金國志曰女眞之初無城郭國主常浴於河牧於野屋舍車馬衣服飲食之類與其下無異國主所獨享者惟一殿名曰乾元所居四外栽柳以作禁宮而已其殿宇遶壁盡置火炕平居無事則鎖之或時開鑰則與臣下坐於炕后妃躬侍飲食

又曰國初無城郭星散而居呼曰皇帝寨國相寨太子莊後升皇帝寨曰會甯府建爲上京城邑宮室無異於中原州縣廨宇制度極草創居民往來車馬雜遯自前朝門直抵後朝門盡爲往來出入之路畧無禁制每孟春擊土牛父老士庶無長幼皆聚觀於殿側民有訟未決者多邀駕以訴至熙宗始有內庭之禁

歷代帝王宅京記卷二十 六

宋氏槐廬校刊

又曰皇統六年春三月上以上京會甯府內太狹纔如郡制遂設五路工匠撤而新之規模雖倣汴京然僅得十之二三而已

許亢宗行程錄曰

宋著作郎以宣和六年使金賀太宗登位

自雄州至上京

會甯府二千五百五十里自雄州六十里至新城縣六十里至涿州六十里至良鄉縣六十里至燕山府八十里至潞縣七十里至三河縣六十里至薊州七十里至玉田縣九十里至韓城鎮五十里至北界清州金國新立地界九十里至灤州四十里至望都縣六十里至營州一百里至潤州八十里至遷州九十里至習州九十里至來州八十里至海雲寺一百里至紅花務九十里至錦州

八十里至劉家莊一百里至顯州九十里至兔兒泊六十里至梁魚務一百三十三里至沒咄寨八十里至瀋州七十里至興州九十里至咸州九十里至同州三十里至信州九十里至蒲里孛堊寨四十里至黃龍府六十里至託撒孛堊寨九十里至漫七離孛堊寨一百里至和里閑寨九十里至句孤孛堊寨七十里至達河寨四十二里至蒲撻寨五十里至館館去北庭十里一望平原曠野間有居民千餘家近闕北有阜圍繞三數頃高丈餘云皇城也山棚之左曰桃源洞右曰紫微洞中作大牌曰翠微宮高五七丈建殿七棟甚壯榜額曰乾元殿階高四尺土壇方闊數丈名曰龍墀

歷代帝王宅京記卷二十七

宋氏魏盧校刊

雲麓漫抄曰燕京東行六十里至潞縣九十里至三河縣七十里至薊州八十里至永濟務九十里至七箇嶺九十里至平州八十里至新安縣六十里至潤州自此皆沿海行四十里至遷州八十里至萊州八十里至隰州八十里至淘河島八十里至胡家務八十里至新城八十里至梯已寨八十里至倉官寨三十里至廣甯府三十里至顯州五里至東館八十里至兔兒塌八十里至梁虞務六十里至遼河大口平津館七十三里至廣州廣平館復望北行七十里至瀋州樂郊館八十里至興州興平館五十里至銀銅館九十里至咸州咸平館三十里至宿州宿甯館八十里至賈道館懷方館四十

里至楊八寨通遠館五十里至合叔孛堇鋪同風館三十六里至義和館五十里至如歸館四十里至信州彰信館七十里至勝州來德館五十里至山寺鋪會方館五十里至威州威德館五十里至龍驤館六十里至洋州常年館六十里至濱州混同館六十里至高平館四十里至同流館五十里至沒搭合孛堇菜同館七十里至烏龍館三十里至虜寨號御寨今之使虜者止至燕未有至烏龍館者

于慎行曰上京會甯府卽今之三衛也

### 開平

元史地理志曰上都路唐爲奚契丹地金平契丹置恒

### 歷代帝王宅京記卷二十一

八

宋氏槐廬校刊

州初元爲札刺兒部兀魯王營幕地憲宗五年命世祖居其地爲巨鎮明年世祖命劉秉忠相宅於恒州東灤水北之龍岡中統元年爲開平府四年以闕庭所在加號上都歲一幸焉至元二年置留守司五年升上都路總管府十八年升上都路留守司兼行本路總管府事元史陳祖仁傳曰至正二十年五月帝欲修上都宮闕工役大興祖仁上疏其略曰自古人君不幸遇艱虞多難之時孰不欲奮發有爲成不世之功以光復祖宗之業苟或上不奉於天道下不順於民心緩急失宜舉措未當雖以此道持盈守成猶或致亂而況欲撥亂世而反之正乎夫上都宮闕崩白先帝修於累朝自經兵火



焚燬殆盡所不忍言此陛下所爲日夜痛心所宜亟圖興復者也然今四海未清瘡痍未瘳倉庫告虛財用將竭乃欲驅疲民以供大役廢其耕耨而荒其田畝何異扼其吭而奪之食以速其斃乎陛下追惟祖宗宮闕念茲在茲然不思今日所當興復乃有大於此者假令上都宮闕未復固無妨於陛下之寢處使因是而違天道失人心或致大業之隳則夫天下者亦祖宗之天下生民者亦祖宗之生民陛下亦安忍輕棄之乎願陛下以生養民力爲本以恢復天下爲務信賞必罰以驅策英雄親正人遠邪佞以圖謀治道夫如是則承平之觀不日咸復詎止上都宮闕而已乎疏奏帝嘉納之

光緒歲在著雍困敦春月吳縣朱記榮槐廬家塾校刊  
歷代帝王宅京記卷二十終